

Sawg Ka Tuxkhax

Studying Of Trouble



Wa, Parauk

Sawg Ka Tuxkhax

Studying Of Trouble

Cao tiem lih : Samlao Pao

Cao Pawd Riieng : Sai Rong Khun

Lox Lai Shiao : Lai Vax

Bawg Plih Lih : Bawg (1)

Khix Num : 9 / 2021

Author : Samlao Pao

Illustrator : Sai Rong Khun

Original Language : Wa

Edition : First Print

Date : Sep / 2021

Wa, Parauk

Myanmar

Copyright © 2021, Literature Department Of WBC, SIL

For permission to reuse, contact the copyright holder.



Ditix, koe tiag ting dah dee ot raokhaox
tix tiag baoh ot kix koe yaong ot kawn pui tix
yaong heue. Dah dee an raokhaox kix gaux
rhawm ot kheu kix yaox ti briex teei ih plix
khaox pa sum kawn pui yam sibhawm praix
heue. Mawh kheu ang kawn pui yuh krax caox
ka raokhaox, kix kied moh ti ot daux tiag an
heue.



Tix ngaix yam miex raokhaox ang nyang hu sawg priex ih kawn, nawh tawm lox ka kawn nawh heue. Miex raokhaox "Kawn aux. . yam aux ang koe daux nyiex, maix paw lih plak praix awx. Phan maix lih hu singai, maix chix yaox ka tuxkhax (krax sivix)" ah ka kawn nawh heue. Khaix hu miex nawh kawn raokhaox keud daux rhawm "Tuxkhax pa ah miex aux mawh patix lie? Koe yuh ka mawx? Aux simie ti yaox" yuh nan heue.



Yam an kheu ang kawn raokhaox cu yien yawg rhawm, ot ang nyawm nawh lih khaing nyiex tix heue. Kawn raokhaox tat rhawm tix hu sawg yaox ka tuxkhax pa ah miex tix heue. Viang nawh chawk tuxkhax ka totiag pa sipub daux krax kawx kix ang cu krai ka nawh heue. Lheu khaing an rhawm nawh baox simie ti yaox ka tuxkhax mai nawh niied coca ti sawg heue.



Kawn raokhaox chawk leeing ngaix yuh ka mawx kawx ang yaox, nawh laux rhawm mai ing ka nyiex tix heue. Krax ing kawn raokhaox, nawh sipub ka tax kuad daux krax ing heue. Kawn raokhaox kied gaux rhawm to hu ka tax kuad an "Tax . . tax tuxkhax mawh patix? Koe yuh ka mawx? Aux simie ti yaox" ah nan ka tax kuad heue. Tax kuad ah "Aw . . rug simie maix ti yaox tuxkhax lie? Hawt khaix aux" tax kuad viex kawn raokhaox an hu dex yaong mai kieh pau ka nawh seh yaong tan heue.



Ot tivud tax kuad deeh hoek khawm teug tix mu "Eue. . kawn raokhaox lo maix ti hawt ka lox krai aux heue. Maix paw paoh teug yam in, paoh yam hoek maix ka gah krax dee ot pex awx" ah nan heue. Kawn raokhaox "Ee tax aux nghiit ka lox tawm maix" ah nan ka tax kuad heue. Khaix an kawn raokhaox kied sidaing gaux rhawm kheu hoik pon nawh ti viex teug tuxkhax ing ka dee ot tix heue.



Kawn raokhaox sidaing gaux rhawm mai klawm teug tuxkhax, hoek sigreung krax nawh simie ti paoh jhak teug an heue. Nawh ang lai kaux sijax ka lox tawm tax kuad tah teug piang tiex mai nawh paoh ti jhak heue. Daux teug an kawn sox kied vao ra mu puh ti lih mai leei ti pheet ka kawn raokhaox heue. Kawn raokhaox kied lhat khawm dex yum ang tawng krax keud mai nawh jah sau riang ti to heue.



Kawn sox vao an ra mu kiex yuh lung ti leei kawn raokhaox son pon kied ka nawh heue. Kheu kawn raokhaox ang koe dee tieb tie son klawd ju kawx, kawn raokhaox plih riangrao uik to ing ka nyiex tix heue. Kawn sox vao ra mu kiex ang cu prah ka kawn raokhaox ceeix kawx heue. Kheu jao hoik luan rheeng to kawn raokhaox, nawh ang lai koe riiang rao ang lai pex taix caong tix mai yaox ti kham geu krax taug mao heue.



Kawn raokhaox ang lai pex pon to mai niied ti haok kapiang khaox pa koe sivoe nawh heue. Khaix an nawh pon toek bhawm tix yam hoek piang khaox mai keud ka lox tawm miex tix mai lox krai tax kuad ka nawh heue. Kheu nawh ang cu nghiet ka lox tawm miex mai lox tax kuad nawh klih rhawm kah heue. kawn raokhaox ang lai tawng pa yuh ka kawn sox vao ra mu an, son sang luan kiex khaing greem khaox ot nawh heue.



Hoik jah laig singaix kawn raokhaox yiiem ot piang khaox mai jhak ka kawn sox vao ra mu greem khaox ot nawh heue. Viang nawh maong ka pa teem kawx ang cu ti hoek heue. Kawn raokhaox ang lai tawng krax yuh yam an nawh lih rhawn ka lox tuxkhax pa ah miex tix heue. Kawn raokhaox tawng ka dee bleeh tuxkhax pa ah miex mawh patix, koe yuh ka mawx mhawm mhawm heue.



Hoik jah praix faik kawn raokhaox laux rhawm yiem "Miex aux . . wu wu . . hoek teem aux liak. Tuxkhax ah pui mawh koe yuh nin lie? Aux nie koeng ka tuxkhax" yo lox khawm yiem heue. Jao lox yo lox yiem kawn raokhaox kawn sox vao ra mu kied lhat mai kiex to ing heue. Kheu ang sox vao lai koe kawn raokhaox niied ti lih khaing khaox mai to ing ka nyiex tix heue. Yam ing nawh ka nyiex kheu faik praix kawn raokhaox ang lai pex chix yaox krax mhawm mhawm heue.

